

**Zeitschrift:** Schwyzerlüt : Zyschrif für üsi schwyzerische Mundarte

**Band:** 28 (1966)

**Heft:** 2

**Rubrik:** Gedicht us Baselbieter Zytige

**Autor:** [s.n.]

### Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

**Download PDF:** 29.03.2025

**ETH-Bibliothek Zürich, E-Periodica, <https://www.e-periodica.ch>**

Dämm dinn hets gwohlet, no dämm Gschwatz:  
Isch jetz dä Zwänzger au für d Chatz,  
So bini doch dä Ploggeist abb,  
Dä sell jetz wieder i sys Grab!

Chuum isch e halbe Tag vorby  
So schwäbt e Ma dur d Milchstroß ii.  
Er loht dr Chopf lo hange, ganz,  
Vrschwunde-n isch drus alle Glanz. —

Vo wyttem gseht er ihn scho cho  
Dr Petrus het im d Tür ufto.  
Er nimmt en liebrich i sy Arm,  
Do wird dä ändtlig wieder warm:  
«We schön isch s do doch, liebe Heer!  
Wenn s ume dunde-n anderscht wär!»

Do aber rückt dr himmlisch Chor  
Mit alle syne selige Sänger vor.  
Sie singe, singe, jo was witt,  
Das bschrybe cha me währli nit!

## **Gedicht us Baselbieter Zytige**

### **Worumm?**

Worumm? Die Frog macht mängisch heiß:  
Solang me halt ni s «Dorumm» weiß!  
Si cha eim ploge, Tagenacht,  
Und doch isch Ein, wo alls jo macht:  
Länkt d Stärne-n-a dr Himmelswand,  
Hebt s Meer, aß nit darf übre Rand.  
Är schänkt de Blueme-n-ihres Chleid  
Vrteilt de Spatze Freud und Leid.  
Kei Enzige, wo abefallt,  
As Är s nit weiß, aß ihm nit gfällt.

Au s Möntscheläbe, mys und dys,  
I syner Hand ischs, glycherwys.  
Är zellt mit blos jo eusi Johr,  
Er zellt sogar no eusi Hoor!  
Wenns dr Vrstand au nit erlickt:  
Är weiß worum er Schweris schickt!  
Är isch dr Hafner, mir dr Lei!  
Drumm stillha, stillha no ne chlei.  
Drno wird zletscht, us dir und mir,  
Wenns gformet ischt, es rächtis Gschir!

### *Muggeliedli*

Will no nes Bitzli lustig sy.  
Wo d Sunn so schön tuet schyne;  
Wenn si undergange-n-isch,  
Chani gnueg no gryne!

Will no nes Bitzli tänzle hütt,  
Do mit myn Muggechindli;  
Morn villicht, wär weiß, wär weiß,  
Waiht es anders Windli?

Will no nes Bitzli gyge hütt:  
I bi jo bym Orchester!  
Morn villicht, wär weiß, wär weiß,  
Weiß i nüt vo geschter!

### Drnoo!

Wenn si d Ärde uf die anderi Sytte draiht,  
Wenn dr Mond mit syner Sichle maiht,

Wenn am Obe d Sunn uferstoht,  
Und dr Orion nümm uf d Jagd goht,

Wenn dr Rhy obsi lauft,  
Und me d Chueh ume Batze chauft,

9      Wenn dr Schnägg im Galopp drvo iilt,  
      Und dr Hamschter nümme stihlt,

Wenn s Nilpfärd s Müüli spizt,  
Und dr Elifant uf s Mälchstüehli sitzt,

Wenn dr Angler e Walfisch fischt,  
Und dr russisch Wolf Gras frißt,

Wenn dr Gugger es Näscht bout,  
Und d Gluggere im Fuchs trout!

Wenn dr Has d Auge zue tuet  
Und dr Truthahn nümm chunnt in d Wuet!

Wenn einisch gryne d Chiselstei,  
Drno chunnt dr Tag, wo d Möntsche Friede hai!

### *Chlemathis*

As we ne Fackle: Tagenacht  
Brennsch du, in dyner blaue Pracht!  
Wo hesch se du au häre gnoo?  
Si isch doch nit vo sälber cho?

Dr Himmel schänkt dr vo sym Blau  
Und d Ärde ihre luttre Tau.  
Dy Fackle het dänk d Sunn aazündt.  
Es blost se-n-us e böse Wind!

Es isch käs Paredys me do:  
Dy Pracht darf ume cho – und goh!  
Darf aber mahne-n-eus doch dra:  
Mr dörfes einisch wieder ha!

### *Dr Föhn*

Er chuttet i de Fohre  
Und tuet as we net gscheidt!  
Er nimmt se bi de Hoore;  
Ghörsch nit we eini schreit?

Dä Kärli, jo, cha suuse,  
Weme-n-in noni kennt  
So chönnt s eim vor im gruuse,  
Wenn är so ummerennt.

Isch aber nit so gföhrli,  
Gseht blos so gföhrlig us:  
Woll tschappet er hütt d Föhrli,  
Morn isch vorby dr Gruus!

Hütt tuet er se no queele,  
As hät er grad e Wuet!  
Morn will er, schön, se stehle,  
Wes süscht e Muetter tuet!

### *Oktoberfescht*

Isch ächt es großis Fescht im Land?  
Dr Wold trait soo-n-es prächtigs Gwand!  
Und doch: Er isch so fyrlig still,  
As we wenn öpper stärbe will.

Es tuet eim jetzt scho wundernee  
Was das denn isch, was s do will gee!  
E Hochzyt? Aber wo isch d Brutt?  
Kä Sänger git im mindschte lutt.

Schlacht dört nit ein vo Stamm zu Stamm?  
Isch öppe das dr Brüttigamm?  
Es isch en öltre, ärnschte Ma,  
Macht Chrüzli – eis am andre-n-aa!

### *Mahnig*

E mänge isch vor Möntsche groß,  
Wo vorim Liebgott blutt und bloß.  
Vor syne-n-Auge schützt kei Glanz,  
Kei Titel und kei Ehrechranz.

Er gseht is Innerscht vo dr Seel  
Und brucht nit z froge, wo s eim fehl.  
Er gseht au dur nes sydigs Gwand,  
Dur jedi Mur und jedi Wand.

Au d'Feischteri vrbirgt eim nit,  
S Änd vo dr Wält isch zweni wyt,  
Und s tiefschti Meer isch zweni tief,  
As sy dört unde-n-ein verschlief.

Für dä, wo d'Änge sälber macht,  
Für dä isch häll die feischtri Nacht.  
Setts einisch i vrgässe ha,  
So mahn my, Herrgott, sälber dra.

### *Wintermonet*

Es schlofe alli Sömlis  
Im Bett i gueter Rueh,  
Und uf de Bäume d Trömlis  
Hei d Augen alli zue.

Au d Sänger tüeie schwyge,  
Zringumm ischs müslistill,  
Keis Heimli tuet meh gyge,  
Wills halt au schlofe will.

Dr Wind, woll, dä tuet blose;  
Ihm goht dr Schnuf nit us!  
Mir tüeie dinne lose,  
Vermache eusers Hus!